

URavi usole omasipala ngombiko

MLUNGISI GUMEDE

ZIVILE phambi kwekomiti elibhekelele ukusebenza kwezimali izolo izikhulu zoMnyango wezokuHlaliswa kwaBantu KwaZulu-Natal ngemuva kokutholakala kombiko omubi kuMncwani-Mabhuku kwisabelo-mali sika-2015/16.

Izolo uNgqongqoshe uRavi Pillay uchaze kabanzi ukuthi yini edale umnyango wakhe uthole lo mbiko kuMncwani-Mabhuku.

Okunye okuvelile izolo wukuthi lo mnyango usebenzise u-R418million ngendlela engafanele.

UPillay ugxeke omasipala wathi banesandla esikhulu ekutheni umnyango wakhe uthole umbiko omubi kuMncwani-Mabhuku.

"Kunomasipala abangayisebenzisi ngendlela imali okwenza kube nzima nakithina

ukuthi simise kahle amabhuku ethu ngoba sifike sibanike imali kodwa umsebenzi ungenziwa," kusho uPillay.

Uthe manje sebezokwenza isiqiniseko sokuthi omasipala bawenza ngendlela umsebenzi ukugwema ukuthi baphinde bathole umbiko omubi kuMncwani-Mabhuku.

UPillay uthethe enye inkanga ababhekene nayo wuphenyo olwehlukene olwenzeka emnyangweni wakhe nakomasipala abathile mayelana nezinsolo zenkohlakalo.

Uthe bakhona kulabo abebethinteka ezinsolweni zenkohlakalo asebethathelwe izinyathelo.

USihlalo wekomiti lezokuHlaliswa kwaBantu uMnuz Important Mkhize, uthethe bekthathazekile ngokuthi umnyango uthole umbiko omubi kodwa banethemba lokuthi

bazosiguqule lesi simo.

UMkhize naye ukhale ngomasipala wathi yibona abadalela umnyango inkanga.

"Abanye balabo masipala abasidalele izinkanga abasekho njengoba sebhlanganisiwe nabanye njengoMasipala waseMbabazane nabanye," kusho uMkhize.

USihlalo wekomiti elibhekelele ukusebenza kwezimali, uNkk Maggie Govender, uthethe bakhathazekile ngokuthi umnyango uthole umbiko omubi kuMncwani-Mabhuku.

UNkk Govender, uthethe batholile futhi ukuthi kunabasebenzi bomnyango abasoleka enkohlakalweni asebelekile bayongena kwezinye izindawo khona kuhulumeni.

Uthe bazoxhumana nehhovisi likaNdunankulu ngerhloso yokwenza isiqiniseko sokuthi laba basebenzi kabaqashwa.

UNGQONGQOSHE
wezokuHlaliswa
kwaBantu uMnuz
Ravi Pillay
Isithombe: ZANELE
ZULU



"Awukwazi ukwenza inkohlakalo eMnyangweni wezokuHlaliswa kwaBantu bese

uphinde uqashwe komunye umnyango kahulumeni," kusho uNkk Govender.

ISOLEZWE

ULWESINE, FEBRUWARI 23 2017

Page 22